

秦邊紀略

第七集

關中叢書

邵力子署

秦
邊
紀
略

陝西通志館印

敘

同治辛未春偶得鈔本秦邊紀略總六卷不著撰人名氏
惟每冊鈐吳稷堂少司空名字小印書中紀年及乾隆則
作者當爲是時人其說取河西各郡縣略載建置始末而
拳拳於形勝戍守每條以府衛爲綱山川城堡官司戎伍
件繫其下至道里程站爲正爲間卽一墩一塢必詳著之
雖未身履其地者按籍而稽瞭瞭如數掌紋其敘述之該
瞻可知也坤修自媿讀書不廣無能攷撰者主名竊以西
陲不靖重勞

宵旰憂勤近日萃師河狄虜勢益蹙自可計日蕩平而由

是鼓行而西進規關內外城壁險隘開屯設戍經營善後
將於是書猶有取資焉爰牒事讎校付之手民役旣竣輒
爲著其崖略云壬申夏五月下浣新建吳坤修敘

關中叢書目錄

第七集

秦邊紀略六卷

清無名氏

楚辭新注八卷

清屈復

河濱遺書鈔六卷

清李楷

漢詩音註十卷

清李因篤

秦邊紀略卷一

全秦邊衛

今天下可患者獨西夷也西夷之患必始西陲西陲當唐虞時禹敷土所及雍州之地服在侯甸間况聲教及流沙靡不卽敍未嘗如後世之遠斥堠阻甲兵以自守也秦築長城因河爲塞起臨洮達九原上郡而河西乃雍州故壤夫已棄之秦之塞亦狹小矣漢武帝元狩二年始於河西置武威酒泉二郡元鼎六年又置張掖燉煌二郡是爲河西四郡至昭帝始元六年置金城郡是爲河西五郡且開西域遠出玉門萬里外置都護唐亦因之二代幅幘可謂

廣矣下逮於宋舉長安故寨多棄而不能守固不逮秦無
論唐漢及明興使耿炳文收河湟馮勝取甘肅而於嘉峪
關畫玉斧以界華夷其煌燉無論數千里委之外藩不知
古玉門陽關者安在遑問都護長史之置然較之秦則亦
過之迄於中葉失東勝而秦漢唐之沃野千餘里在河山
之內所謂河套者公然爲穹廬歷二百餘年矣今之疆域
率由明舊可攷而知也其地南始於階州而河州西而西
寧折而北而莊浪又西而涼州甘州肅州東而靖虜寧夏
極於榆林皆邊衛也其塞則或山或河或長塹其緣沿道
里則六千九百里有奇其邊吏或專閫或分符或偏裨荷

戈之士合五萬有奇時或更張而靡定也其人則漢人土人雜以黑番回回黃番番僧衆寡不一要皆在疆域之中其環於外者則西夷西夷所環始河湟盡寧夏蓋河州之南阻蜀山寧夏之東限河套也考西夷之雜錯西陲者部落數十種而數十年間受羈縻不敢大肆憑陵者種類區分力敵而勢均內懼相兼而謀不協無有能統屬之者是以苟安於無事今且有如冒頓者強兵習戰東討西征擊月氏樓蘭烏孫等數十國控弦之士數十萬錯雜塞下之夷率皆頓首稱臣望風從命嗚呼可懼也已夫遠有冒頓之禍近有門庭之寇苟任捍禦者狃於無事不免棘門灞

上之不戒則西陲之憂曷有已哉

河州

河州晉所名也漢曰大夏隋曰枹罕唐曰安鄉宋曰寧河

明因晉而名之蓋黃河入中國始於河州禹之導河積

石是也

衛古西羌地漢爲大夏郡屬金城隴西二郡晉爲河州亦曰枹罕縣隋初爲河州尋改枹罕郡

唐爲安鄉郡又曰安昌縣宋曰寧河州亦曰枹罕今州西有枹罕古城州南六十里有寧河城明洪武初鄧愈

收復河州洪武五年置河州府十二年置河州衛屬臨洮府今因之黃河發源於星宿海遶崑崙遠流入中

國先河州次蘭州又次靖虜至寧夏統河套折而東南入榆林黃甫川出套經秦晉豫齊魯淮而入於海積石

卽今積石關在衛西一百三十里漢宣帝置河關縣隋置河關郡宋積石軍駐其地稱積石城焉河州

雖亦邊地雜於西羌然自有郡縣以來未嘗淪於夷者

何也河州東有臨洮之府北有蘭莊之阨南有洮州之

塞西有西寧之環四塞內地獨以一隅臨邊非如他衛

孤懸斗立者比也

衛本羌地今之生番熟番皆西羌種類也臨洮府在衛東北一百九十里

莊浪衛在衛西北由喇嘛川黃河西渡四百里蘭州在北由洮河黎子山一百八十里洮州在南由和政驛二

百八十里寧夏衛在西由永凌寺渡黃河經古鄯川口四百六十里由積石黃河上渡經巴煖三川翟曇寺四

百五十里衛西南一隅通河曲河曲本在黃河內明正德間夷人據之以至於今且不特地利

也衛之兵雖少其民甚強其土人甚勝其熟番皆轄於

土官其黃衣僧皆聽命於國師其弓矢及矛比屋皆有

無事則耕牧爲生有事則相爲守助其馬則蕃庶羌人

畜牧尤多明置立茶馬司於是其土地所生有麥有糜

有豆有青稞且移粟以資湟中然則四境之內襟山帶

河兵食足矣雖亦臨邊可謂內地宜乎不淪於夷也今衛

設副戎一又起臺堡保安堡歸德堡守衛三人或云其先世夷人居中土已久服食男女於中國無別且久與漢人連姻與漢人言則操漢人音又能通羌人語其實心爲漢非羌夷所可及云西寧莊浪者亦然衛西番二十四族皆轄於蘇韓哈王四土官黃衣僧卽番人爲僧者衣帽皆黃衛番僧甚多所在動以千計寺有一國師皆襲封其最尊者有金印蓋洪武間因番僧公哥監藏巴藏人等入貢於是賜詔封圓智妙覺弘教大國師使其統治僧民衛出馬特多有土人熟番回回生番俱以孳牧爲業按洪武七年立茶馬於河州弘治間楊一清言唐時回紇入貢卽以茶易馬宋熙寧間行之所謂採山之產易廢之良無害而有利者也我朝納馬謂之差發如田之有賦身之有庸非虐使於番因納馬而酬茶體尊名順非互市交易之比且西番爲中國藩籬其人本非我之孝子順孫徒以資茶於我絕之則死故俯首服從此制番之上策前代略之而我朝獨得之者也頃自金牌制廢而私販盛行失利已久豈徒邊方乏騎乘之用將來番無資於我跳梁自恣將生意外之憂徹藩

籬之固甚非計也今茶馬互市亦同於昔官茶易馬每
揀頭八封茶十二易皇馬一騎揀頭六封茶八易營馬
一騎揀頭四封茶六易驛馬一騎云衛雖不產稻而麥
豆雜糧隨地皆有囤糧多至二萬六百八十石可以知
之矣麥豆雜糧輦載驢馱以往西寧者不絕於河州在
路衛治西至黃河四十里北至黃河八十里

昔至今不淪於夷而明中葉以來乃有竊據一隅觀變

而動者咸脇從我屬番殺掠我兵民焚燒我積聚要盟

我城下往往有之何也

武宗正德四年火落赤據捏工
川常犯河州真相據莽刺川亦

犯河州今西夷達達肅住牧捏工川及南岔難部落三
十有奇康熙十四年圍衛城一月康熙二十二年又犯

衛西南有二十四關關之外有甌脫之地名河曲焉亦

謂之九曲之地是所謂小河套是也雖在河內千里間

地無居人近有起臺遠有保安尤遠有歸德繕堡屯兵

於其中曾滄海一粟之不若宜夷之盤據滋蔓於河曲

爲我河州患也

麻山關安龍關大馬家難關小馬家難關鴉塘關斗石關思巴思關殺馬關喬

家又關西關槐樹關閃半嶺關土門關朵只巴關牟花關老鴉關別藏關崔家關石嘴關樊家關五臺關積石

關紅崖關今所謂二十四關也關皆山險林木茂密關之東則河州內地關之西則小河套卽九曲之地亦曰

河曲蓋黃河曲折傍岸之總名也起臺堡在衛西二百里保安堡在衛西六百七十里歸德堡在衛西一千二

百里三堡皆在河曲地各堡僅以守備其兵民俱非漢人乃土人云三堡之兵分地偵探此舊制也夫西

南之間內有二十四關以爲扼塞而猶有夷患者何也

蓋二十四關崇山峻嶺茂木深林蹊徑狹隘有山川之

險矣關東二十四族之番雜土人回回而居有民人之

衆矣苟相地而置兵因形而乘鄣夷固不能以飛越灼

灼明矣今河州起臺之兵盡壞分守之一關之間寥寥
數人焉民雖強不可以勝戰地雖險不可以無兵乃經
畫之疎顧至於此是猶使三尺之童當戶而捍虎狼之
入也豈可得哉二十四族熟番專事牧馬每族有土官
爲長以統束之二十四關自麻山而西

北至石嘴皆河州之兵防守自
老鴉而北皆起臺之兵防守

二十四關外雖千里空

虛地然有起臺保安歸德三堡而夷猶盤據蔓延者何
耶淮南王曰非強不能服非威不能制當明初興鄧愈
詔諭河州雖絕遠如朵甘思烏斯藏咸慕義來歸况疆
域之中如河曲者乎夷不敢居河曲則設官置戍於三
堡不過遠爲偵候耳及其衰也亦卜喇據青海而火落